

I VALORES DE LA COMUNITÀ DE FASCIA TI FAC, TI DOCUMENTS E TI SÌMBOI DE SIA ISTORIA

Al scomenz del XVII centené, te la sala dant da la canzelaria del Consei aulich tel Palaz episcopal de Persenon, l'é stat depent i blasons de duta la giurisdizions sot l'autorità del piscop da Persenon. Te anter se tol fora, per semplicità de dessegn, chel del Giudizie de Fascia (*Eves*): L Pèster con corn, bisacia e bachet, metù te anter monc spic e adorc. Chest, a rejon, l'é conscidrà l símbol de Fascia no demò percheche l'à referimenc ti documents, ma soraldut percheche l'é bon de raprejentèr la istoria de la jent de Fascia e meter al luster valores veiores desche l leam col teritorie, la solidarietà anter la persones e la dedizion al lurier.

I prumes stanziament te Fascia l'é stat fazile chi di pèstres che se moea da la pianes fin japede la Dolomites. L'insediament preistorich di Pigui de Mazin, che va endò a l'Età del Fer, e i reper archeologics del IV-III centené dant de Crist su da la geja de Sent'Ugèna i à metù al luster l carater coletif de la pruma jent che l'é stat te Fascia. Spartir chel che i aea, depener l'un da l'auter e se lascèr sui etres l'era l fundament e dutun la spenta del viver adum. Enscin dal scomenz donca l'om e l teritorie, con sia particolaritèdes, i ge dèsc foja a na comunanza che tegn adum.

Chesta struttura é confermèda ence dò, canche vegn sù de picoi paijes, aldò del model celtich-retich. Chesta viles les é sul fon de val o a mesa costa via, con gropes de cèses sui erc a teraza e no l'é auter che pecia majons una su per l'autra desche a moscèr ence coi mures l leam anter la jent. La spartijon del teritorie ge va dò a chesta impostazion aldò de veies prinzipies de valivanza e solidarietà. I terens é spartii sù te picoi possedimenc che ge dae a duc da viver, enveze pèscol e bosch l'é l ben comun de duta la popolazion.

Te n raion da mont puret de ressorses chesta sort de endrez la é del dut naturèla. Meter adum la forzes fèsc pèrt de na biota logica economica, soraldut te situazions de stenta. Chest prinzip vegn aplicà no demò per l'aministrazion di bens, ma ence per la gestion del teritorie, ence de la costions de la defendura.

Apontin dal besegn de defenir i raporc co la popolazions vejines nasc, tel XII centené, la Comunità de Fascia, descheche la cognoscion fora dai documents. La Comunità de Fascia strenc raporc de amicizia e defendura con altra istituzions de Fiem (1264) e del Primier (1303), con Remberto, signor de Fié (1298) e na convenzion coi moenac per passèr da la mont de Falcade (1304). Chisc documents palesa capacità de autogovern e libertà politica, pur tel recognoscer la diretta dependenza dal piscop de Persenon, ma senza interferenzes de vassai e feudataries.

Le "*antiche libertà*" tanta outes declarèdes o pertendudes dai fasegn no fèsc referimenc a la mencianza de na autorità soravia, per centenees stat chela del prinz piscop de Bersenon a chel che aboncont i ge à semper desmostrà lealtà. Vegn fora istesc n sentiment de identità e de particolarità che spenc la jent de Fascia a esser stolza e se tor fora da l'autra popolazions. Ence se no l'é na bandiera ofizièla, l'é enteressant veder che la soula testimonianza de na bandiera che raprejente duta la comunanza l'é chela durèda dai militères voluntadives de Fascia che del 1809 i é jic a scombater contra Napoleon. Chesta bandiera, tegnuda sù tel Museo Ladin, l'à ite strisces orizontèles de color vert, bianch, brun chièr e color òr, e la recorda i colores de la bandiera ladina. Libertà e identità chiamà donca semper adalerch l'idea de comunanza, de spartir n ben comun e che l govern l'é n derit-dover de duc.

La struttura economich-sozièla de la val, pojèda enlouta beleche deldut sul lurier da bacan, l'à segur didà madurèr chel'atenzion a la coletività. Soraldut tegnir feides e ciaures, descheche l'é stat te Fascia per centenees, volea dir lurèr adum, e donca se creà situazions delicates che aea besegn de régoles. Se cognea binèr ensema la besties te schiapas per se spostèr, spartir l pèscol, endrezèr ensema la soravèrdia, se defener contra i pericoi, tegnir sù i deric te l'inom de ogneun.

Enscin dal scomenz troon donca na comunanza de jent con n endrez ence politich, con atenzion ai valores de democrazia e raprejentatività. L'òrghen prinzipèl de la Comunità l'era l plazit, l *comun general* o *pìen comun*, che fossa stat l'assemblea de duc i vejins (i sentadins che stajea te na vicinia, donca n grop de cèses), chiamèda ite te la pieif de Sen Jan, che cognea fèr fora dezijions per duta la comunanza. I fac ordenères de la comunanza vegnià rejoné tel *Comun Ordinario*, la radunanza, dedant dal Capitano, di procuradores e di omegn de responeta, doi per régola, chiamé coscita percheche i aea l'encèria de binèr sù la opinion de si vejins su la desvaliva proponetes.

Ti prumes documents de la Comunità troon i *ambassadors*, che vegn descrit desche raprejentanc no demò de la comunanza ma ence del piscop de Persenon e l *degano*, térmen polivalent che anter l'auter l defenia l capo aministratif de na giurisdizion. Più tèrt chesta pèrt i la fèsc i *procuradores*, lité tel numer de doi, desche responsàboi de la Comunità per i fac economics, aministratives, sanitàeres, foresc e vèlch outa ence giudizières e de la geja. Emportanza i aea i 12 giurati che fajea la *Bancha della Ragione* e i aea, estra la funzion giudizièra, ence chela de testamonesc e stimadores.

Mériata se fermèr sun chesta istituzions ajache l'era la strutura che tegnìa sù la Comunità. Vegn fora na organizazion trop democratica, pojèda sun doi prinzipies fundamentèi: la roda de la encèries (conscidrèdes doveres envers la Comunità) e la dezijions toutes a maoranza te assemblees califichèdes da n criterie prezis de raprejentatività. Chesta atenzion, vèlch outa adertura meticulousa, che sie prejenc duc e, soraldut, che la encèries vegne portèdes inant per n trat da n gran numer de sentadins a roda, la se à traslatà te na vejinanza de la jent che l'é stat la forza de la Comunità de Fascis e che l'é l'obietif de n bon endrez politich.

Defat a tor via òrghegn e feures aministratives se à endeboli n muie la Comunità. I desvalives limic emponui a la fin del XVIII centené, dant de dut la libertà de se binèr adum tel *pien comun*, à soscedà protestes e rebelions e i à metù al luster la crisa de n sistem che é jit fora, del 1803, canche l'é stat tout jù l Prinzipat Episcopal e la istituzions che l'era apede. Del 1815 l'é stat metù sù na neva istituzion chiamèda Comunità Generala de Fascia che l'era en pràtega n consorzie di comuns de val. No vegn nominà assemblees generèles, vegn tout jù outra istituzions tipiches de la veia Comunità e donca no l'é più chel leam diret co la popolazion che se palesà co la litazion e la roda di desvalives raprejentanc. La neva Comunità l'à amò vèlch veia competenza ma la vegn metuda dò dai comuns e la se envia envers sia fin. Del 1954 l'é stat fat la ùltima sescion di raprejentanc de la Comunità Generala de Fascia.

Te la istoria de Fascia se lec chièr che l ben publich l'é l'obietif de duta la istituzions che laora sul teritorie, dant de dut la pieif. Fèr pèrt del medemo distret eclesiastich à didà l'istituzion comunitaria a tegnir adum tel temp. I documents cognosciui ne porta a dir en ùltima che la Comunità e la Pieif de Fascia lurèa una apede l'otra per l ben de duc.

Zenza sconer la tropa costions anter la regoles (deric de pèscol, de passèr...) e la stritariès anter pievegn e vejins, fora per l temp se à tegnù viva na gran conscidrazion de la coletività. Te la manieres, ti lengac e te la prozedures scrites, sibie de la jent che de la istituzions (régoles, moniaries, confraternites, pieif, curazies) l'era semper chela idea de *Ben Comun*, che la Comunità defenea e tegnìa sù.

La Comunità de Fascia é nasciuda e se à fat fora te na sozietà olache l conzet de leam l'era fort: leam col passà e co la veia usanzas, con sia tera e te anter la jent. Fedeltà a la reijes, defendura di deric, sentiment de partegnuda e solidarietà l'é la colones che tegn sù centenees de istoria.

Canche l'é jit a sparir i òrghegn e la feures che raprejentèa la compartecipazion de duta la popolazion de la Comunità, chesta à tacà a perder sia emportanza e sia fazion. La ressorses economiches no à didà mantegnir la Comunità (descheche l'é stat alincontra te outra realtèdes singoles o de val) ajache les era n muie pìcoles e no les saea tegnir adum. Chel che tegnìa adum enveze l'era l *Ben Comun*, conzet ideèl che detèa la azions comunitaries e che portèa a spartir i bens, l'ùtol e l cost, e a lurèr adum per jir sorafora l'enteress particulèr al ben de duc.

Noscia istoria ne consegna na esperienza veiora olache i fascegn "seppero sopportare pesi onerosi piuttosto che rinunciare alle istituzioni comunitarie e alle tradizioni degli avi". (p. Frumenzio Ghetta)

Ades scomenza n temp nef olache chesta istituzions comunitaries pel jir inant demò se les ge va dò al prinzip, sinzier e dejenteressà, del ben comun.